

Loro ringratiarono la Signoria de la demonstration, ma disseno el signor Duca desiderava con la persona voler andar a difender el suo stado. El Serenissimo li disse si saria con l' orator del re Christianissimo, poi se li risponderia.

- 3 *Da Brexa, di sier Zuan Ferro vicepodestà et sier Cristofal Capello capitano, di 26 et 27, tra le qual vidi lettere del ditto vicepodestà, di 26.* Come haveano hauto alcuni avisi de Valcamonica, per uno de quali siamo avisati, che a Fustinborgo, terra franca ne la Elemania bassa, se facevano adunatione de zente et se divulgava diversamente dove dovesseno andar, o a danni de Franza, o venir in Italia. Questo aviso è per lettere de uno missier (Piero) de Federicis, scritta al nostro capitano de Valcamonica. L' altro aviso è de uno missier Zuan Piero Caprini, drizzato a uno missier Antonio Demona, nel qual se contien in sustantia, come a la dieta fatta erano stati molti capetanei, et che hessendo stà dimandato zente per Italia, li haveano recusato de dar, digando non voler andar per acquistar el ducato de Milano, ma che contra turchi dariano favor volentieri. *Avisa etiam* de la angaria messa al contà de Tiruol per bona summa de danari, et che 'l re Ferandino già assai giorni era partito per Hongaria. Scrive mandar questi avisi a la Signoria, et che aspectano nostri messi, et *cum* verità se intenderà quei successi, et de quanto riporterà, aviserà.

- Del ditto, di 27 Fevver.* Come heri zonse qui uno zentilhomo del Gran Maestro de Rodi, el qual vien de Provenza, mandato da esso Gran Maistro per tuor de qui 300 corsaleti et altre arme, de le qual non se li darà altra licentia dil trar, se 'l non ne sarà commesso da la Illustrissima Signoria. Referissè che, zonto a Savona, fu fatto uno gran tumulto de arme tra quei de la terra et spagnoli, et fu morti 4 spagnoli. Dice che domenica passata poi zonse a Zenova, et haver veduto far la monstra a 7000 fanti, però de quei de la città, i quali el forzo erano zentilhomeni ben vestiti et ben armati, che è come una ordinanza, che stima sia fatta per difesa de la città. Scrive, esso podestà, hozi se aspetta qui el conte de Caiazo, el qual dia andar a veder combatter a Castel Zufredo do, ai qual è stà dato el campo, dove ge va infiniti de questi zentilhomeni brexani; et combateno dui valenti homeni, uno Piero da Fan et uno banderaro del signor Camilo Orsini. Del seguito aviserà etc.
- 3\* *Da Lodi, di sier Gabriel Venier orator, di 27.* Come el signor duca de Milan sta a l' usato;

non se pol mover nè aiutar de piedi, nè de le man. Et per avisi ha auti soa excellentia, a Milan el signor Antonio da Leva stava malissimo et zà do zorni era stà abandonato da li medici, et che li capetanei alzati fuora de Milan per questo erano venuti in Milano. *Item*, scrive come uno . . . li a Lodi havia ditto certo che 'l ditto Leva non viveria 6 zorni, se no, li fusse taiato la testa; et el signor Duca lo havia fatto retenir per veder se 'l diceva la verità.

Vene in Collegio l' orator del duca de Milan domino Benedeto da Corte, dicendo haver hauto lettere del suo signor duca, che 'l ringratiava la Signoria de esser stà contenta de servirlo di 10 milla ducati, a ducati 5000 al mexe, Marzo et April; nè altro disse, se non questa nova che Antonio da Leva a Milan stava griève.

Vene l' orator de Franza, con el qual el Serenissimo disse la rechiesta del duca de Urbin de andar nel suo stato etc., perchè par spagnoli vogliano venir a quella via. *Item*, li disse la reconduta heri havemo fatto a soa excellentia et al fiol. Esso orator disse non li pareva se dovesse mover adesso de Lombardia, che saria un ruinar la impresa, et . . .

Veneno poi *iterum* li do oratori del signor duca de Urbino sopraditto, per haver la risposta, a li qual el Serenissimo disse . . .

*Da Fiorenza, vene lettere di sier Antonio Surian dottor et cavàlier, orator, di 24 et 25 Fevver.* Come hanno aviso che spagnoli col principe de Orangie erano a la Lionessa, et davano danari a le zente, et che voleno venir in Toscana per andar in Lombardia. Poi *item* fono lettere da Napoli de 12, in l' orator de Siena, che scriveno li si dava danari a le zente et lanzinteh per venir in Toscana, *unde* quei Signori, dubitando de fatti loro, haveano fatto provision de trovar ducati 200 milia. *Item*, fatto 4000 fanti. *Item*, fatto commissario un loro cittadin nominato Rafael Hironimi, et scritto al capitano zeneral suo, ch'è don Hereules fiol del duca de Ferrara, che vengi con le zente in Toscana. *Item*, voriano aiuto etc. Scrive come per le do nave de grano, fo prese per zenoesi a Porto Hercules et condute in Zenoa, che doveano venir a Livorno per condur li grani a Fiorenza, hanno eleto orator a Zenoa uno nominato Lotier Girardo.

In questa matina, partite de qui sier Andrea Navaier, va orator in Franza, in cambio de sier Sebastian Justinian el cavalier.